

骸委頓慮恐一旦沉沒泉壤上請天官賜秩君一人官將一百二十人左右吏兵一百二十人爲某治之開生門益壽命當請南上君一人官將一百二十人在倉廩宮爲臣某延年長生不死仰荷大道生成之恩臣某誠惶誠恐稽首再拜又長跪曰臣某自居止此已來夢想不安及有凶強故氣之鬼不忌太上道法每來逼近身中若不早請天官將吏削除日月深遠恐爲災禍臣今謹上請召仙君一人官將一百二十人乞制滅凶危故氣之鬼使真氣降流室宇清淨妖邪斥卻耳目聰明仰荷大道罔極之恩臣某誠惶誠恐稽首再拜便於彼處地土伏地以簡叩頭搏頰訖起立復鑪呪曰

道藏輯要

雲笈七籤

八

井集三

香官使者左右龍虎君捧香使者三氣正神當令朝真之所自然生金液丹碧芝英百靈眾真交會在此香火案前令臣修道克合至真闔門受福天下蒙恩仙童玉女侍衛香烟傳臣所奏徑至帝前再拜便出勿回顧入靖預約家人勿令囂喧畢須寂然

已上五等朝儀及魏夫人傳嵩嶽吳天師亦常用此儀也

入靖法第十

真誥云上清真人馮延壽訣曰凡人入靖燒香皆當對席心拜叩齒陰祝隨意所陳唯使精專必獲靈感正心平氣故使人陳啟通達上聞也燒香時勿回顧顧則忤真致邪外應又清虛真

人曰每入靖當以水漱口洗穢氣出靖漱口以閉三宮故氣出靖戶之時亦不得反顧顧則忤真克致不誠入靖戶之時不得與外人言語及不得腳踏門限勅禁至重

燒香法第十一

太上教曰夫燒香不得以口嚙香靈禁至重登真隱訣曰夫朝奏之時先烈火豐香使一舉便到了不宜綿綿翳翳

存思訣第十二

天師燒香儀曰入靖燒香常存左青龍右白虎前朱雀後玄武陸先生思神訣曰常存鑪左金童右玉女侍香烟也李氏儀曰存香火中有五色烟也玄都入治律曰呈章朝真存五方氣及

道藏輯要

雲笈七籤

九

井集三

功曹使者吏兵左右分位森然如相臨對待左右前後天師墨教篇曰入靖燒香皆目想髮髯若見形儀不可以空靜寂然無音響趨拜而退也

叩齒訣第十三

九真高上寶書神明經曰叩齒之法左相叩名曰打天鐘右相叩名曰搥天磬中央上下相叩名曰鳴天鼓若卒遇凶惡不祥當打天鐘三十六遍若經凶惡辟邪威神大咒當搥天磬三十六遍若存思念道致真招靈當鳴天鼓當以正中四齒相叩閉口緩頰使聲虛而深響也

臨目訣第十四